

四庫全書

集部

欽定四庫全書

集部

渭南文集

目錄
卷一
至四

詳校官庶吉士_臣陳若霖

主事_臣呂雲棟覆勘

總校官知縣_臣繆琪

校對官典簿_臣郭祚職

謄錄監生_臣李璜

欽定四庫全書

集部四

渭南文集目錄

別集類三 宋

卷一

表

牋

卷二

南宮表牋

卷三

劄子

卷四

劄子

卷五

奏狀

卷六

啓

卷七

啓

卷八

啓

卷九

啓

卷十

啓

卷十一

啓

卷十二

啓

卷十三

書

卷十四

序

卷十五

序

卷十六

碑

卷十七

記

卷十八

記

卷十九

記

卷二十

記

卷二十一

記

卷二十二

銘

贊

記事

卷二十三

傳

青詞

疏

卷二十四

疏

祝文

卷二十五

勸農

雜書

卷二十六

跋

卷二十七

跋

卷二十八

跋

卷二十九

跋

卷三十

跋

卷三十一

跋

卷三十二

墓誌銘

卷三十三

墓誌銘

卷三十四

墓誌銘

卷三十五

墓誌銘

卷三十六

墓誌銘

卷三十七

墓誌銘

卷三十八

墓誌銘

卷三十九

墓誌銘

墓表

壙記

卷四十

塋銘

卷四十一

祭文

哀辭

卷四十二

天彭牡丹譜

風俗記

致語

卷四十三

入蜀記

卷四十四

入蜀記

卷四十五

入蜀記

卷四十六

入蜀記

卷四十七

入蜀記

卷四十八

入蜀記

卷四十九

詞

卷五十

詞

臣等謹案渭南文集五十卷宋陸游撰游字務觀山陰人以蔭補登仕郎官至華文閣待制致仕為南渡詩人之冠事蹟具宋史本傳游有詩文二集文集為其子通所編游晚封渭南伯故以為名第一卷至四十一卷皆古文第四十二卷為天彭牡丹譜風俗記致語

四十三卷至四十八卷為入蜀記四十九卷
至五十卷皆詩餘陳氏書錄解題渭南集三
十卷此本多二十卷疑振孫偶訛五字為三也
游晚年為韓侂胄作閱古泉南園二記以此
為清議所譏其文不載於集中至明毛晉輯
逸藁乃從葉紹翁四朝聞見錄中取以附入
則通編集時殆欲諱其父之為似道作記而
刪之歟乾隆四十四年九月恭校上

總纂官臣紀昀臣陸錫熊臣孫士毅

總校官臣陸費墀

原傳

陸游字務觀越州山陰人年十二能詩文蔭補登仕郎
鎖廳薦送第一秦檜孫埴適居其次檜怒至臯主司明
年試禮部主事復置游前列檜顯黜之由是為所嫉檜
死始赴福州寧德簿以薦者除敕令所刪定官時楊存
中久掌禁旅游力陳非便上嘉其言遂罷存中中貴人
有市北方珍玩以進者游奏陛下以損名齋自經籍翰
墨外屏而不御小臣不體聖意輒私買珍玩虧損聖德

乞嚴行禁絕應詔言非宗室外家雖實有勲勞毋得輒加王爵頃者有以師傳而領殿前都指揮使復有以太尉而領閣門事瀆亂名器乞加訂正遷大理寺司直兼宗正簿孝宗即位遷樞密院編脩官兼編類聖政所檢討官史浩黃祖舜薦游善詞章諳典故召見上曰游力學有聞言論剴切遂賜進士出身入對言陛下初即位乃信詔令以示人之時而官吏將帥一切翫習宜取其尤沮格者與衆棄之和議將成游又以書白二府曰江

左自吳以來未有捨建康他都者駐蹕臨安出於權宜
形勢不固饋餉不便海道逼近凜然意外之憂一和之
後盟誓已立動有拘礙今當與之約建康臨安皆係駐
蹕之地北使朝聘或就建康或就臨安如此則我得以
暇時建都立國彼不我疑時龍大淵曾覲用事游為樞
臣張燾言覲大淵招權植黨熒惑聖聽公及今不言異
日將不可去燾遽以聞上詰語所自來燾以游對上怒
出通判建康府尋易隆興府言者論游交結臺諫鼓唱

是非力說張浚用兵免歸久之通判夔州王炎宣撫川
陝辟為幹辦公事游為炎陳取進之策以為經略中原
必自長安始取長安必隴右始當積粟練兵有釁則攻
無則守吳璘子挺代掌兵頗驕恣傾財結士屢以過誤
殺人炎莫誰何游請以玠子拱代挺炎曰拱怯而寡謀
遇敵必敗游曰使挺遇敵安保其不敗就令有功愈不
可駕馭及挺子曦僭叛游言始驗范成大帥蜀游為參
議官以文字交不拘禮法人譏其類放因自號放翁後

累遷江西常平提舉江西水災奏撥義倉賑濟檄諸郡
發粟以予民召還給事中趙汝愚駁之遂與祠起知嚴
州過闕陛辭上諭曰嚴陵山水勝處職事之暇可以賦
詠自適再召入見上曰卿筆力回斡是善非他人可及
除軍器少監紹興元年遷禮部郎中兼實錄院檢討官
嘉泰二年以孝宗光宗兩朝實錄及三朝史未就詔游
權同修國史實錄院同修撰免奉朝請尋兼秘書監三
年書成遂陞寶章閣待制致仕游才氣超逸尤長於詩

晚年再出為韓侂冑撰南園閱古泉記見譏清議朱熹
嘗言其能太高迹太近恐為有力者所牽挽不得全其
晚節蓋有先見之明焉嘉定二年卒年八十五

欽定四庫全書

渭南文集卷一

宋 陸游 撰

天申節賀表

化國之日舒以長運啓千齡之盛天子有父尊之至心
均萬寓之驩敢即昌期虔申壽祝

中賀

恭惟太上皇帝陛下

宅心清靜受命溥將協氣熏為太平華夷銜莫報之
德孫謀以燕翼子宗社侈無疆之休誕敷錫於下民丕

靈承於上帝臣方馳使傳阻綴朝班望睟表於雲霄敢
恨微蹤之遠被頌聲於金石尚希薄技之陳

會慶節賀表

有王者興爰啓丕平之運使聖人壽敢忘胥戴之誠

賀中

恭惟皇帝陛下蕩乎無名建其有極干戈載戢恩加遼
碣之區圉圉一空治格成康之上斂時百福享國萬年
臣迹滯遐陬心馳魏闕紀虹渚電樞之慶莫廁諸儒演
龍宮燕笈之文徒修故事

又

帝生商而立子有開必先民戴舜以同心無遠弗届乾

端肇闢嶽貢交修

賀中

臣早以湖海之微生親見唐虞之

盛典蓬轉逾二十年之久每注想於冕旒嵩呼上千萬

壽之時獨阻陪於簪笏茲膺郡寄復在王畿目瞻佳氣

之鬱葱耳聽驩聲之洋溢永言疎賤已極光榮恭惟皇

帝陛下煥乎其有堯文粲然而興周道三朝圖籍將還

滎河溫洛之都萬里車書已軼碣石榆林之壤以仁政

廣華夷之德澤以豐年奉郊廟之牲牷凡曰含齒戴髮
之儔均被淪肌浹髓之賜光御無疆之厯益培有永之
年臣猥以分符莫遑造闕簫韶方奏徒傾就日之心歌
頌可陳尚刻齊天之石

瑞慶節賀表

虹流電繞適當聖作之辰鼇抃嵩呼共效壽祺之祝敢
傾丹悃仰叩睿聰賀中恭惟皇帝陛下德當乾符躬有聖
瑞東漸西被偉聲教之混同上際下蟠極仁恩之滂漉

帝生商而立子民戴舜以同心歷考前聞孰逾盛際臣
生逢千載仕歷四朝嶽貢川珍猥預駿奔之末薦飛魚
躍永依洪造之中

光宗冊寶賀表

龜食簞從考廟方嚴於典冊仗全樂備都人咸覲於禮
容聖教茂昭驪聲旁達

中賀

恭惟皇帝陛下道參穹壤德

肖祖宗稽周王小毖之求躬虞帝終身之慕父傳歸子
有光盛舉於兩朝天定勝人果見太平於今日乃咨元

老大臣之參訂兼采議郎博士之討論勒崇垂鴻極高
蟠厚臣在列覩龍飛之旦紬書奏麟趾之篇際遇特殊
等夷罕及既莫預曲臺之議又阻從屬車之塵徒有悵
誠形於夢想

皇帝御正殿賀表

肅傳清蹕端御昕朝德上際而下蟠澤東漸而西被
恭惟皇帝陛下體天廣覆如日正中率禮無違永歎歲
月遷流之速嚮明而治勉禽臣民愛戴之心諏太史涓

賀中

吉之辰采奉常縣蕤之議對揚宗社之福爰舉公卿之
觴兩曜清明四方抃舞臣農疇齒髦帝所夢遙華袞光
臨雖莫望火龍黼黻之盛黃麾備設尚想聞金石絲竹
之音

皇太子受冊賀表

明詔建儲永為宗社之本正衙發策顯畀神祇之心國
勢奠安輿情闡澤中賀恭惟皇帝陛下若稽古訓駿惠先
猷壽考億年誕膺不蔽之福本支萬世坐擁無疆之休

存心養性以事天修身齊家而治國迨舉有邦之慶益
昭知子之明臣跡遠周行心馳魏闕命太史卜日之吉
徒聞播告之傳遣上公持節以行莫預觀瞻之盛儻未
辭於聖代尚自力於聲詩

賀明堂表

農扈屢豐協氣方流於縣宇合宮大享曠儀遂舉於中
天驛置星馳嵩呼雷動伏以聖神在御祈報間行肆嚴
長至之祠一舉上辛之典惟茲宗祀實在季秋既得萬

國之驩心宜罄一精之嘉薦

中賀

恭惟皇帝陛下範圍元

化斧藻太平采皇祐之舊章茂建中和之極稽紹興之
新制用適古今之宜上帝顧歆殊休叢委臣官廩遐徼
心繫明廷考漢家汶上之圖嗟莫陪於潤色繼周頌我
將之作尚自力於形容

謝明堂赦表

明堂總章舉曠儀於路寢鈎陳羽衛敷大號於端闈德

協穹祗春回海縣

中謝

恭惟皇帝陛下道繩祖武政酌民

言乾文仰法於房心肇稱鉅典解澤默符於雷雨一洗
衆愆統和天人空虛圉圉臣適乘使傳遠在遐陬奉五
百里之驛書徒深鼇抃上千萬年之聖壽莫綴鳧趨

謝赦表

宣布仁恩發揚孝治觀人心之鼓舞知天命之協從

中謝

恭惟皇帝陛下躬舜禹之資履曾閔之行損又損而至
道老吾老以及人一日三朝雖極寧親之大養四方萬
里尚憂庶獄之無辜內廣惠心旁流霈澤雨露所被罔

園一空臣適以守藩恭聞孚號雖與民欣戴如瞻咫尺
之天然受命禱祈實勞方寸之地

謝賜歷日表

春秋以王而次春不顯體元之妙閏月定時而成歲適
當頒歷之辰治象一新歡聲四溢

中謝

恭惟皇帝陛下道

兼倫制化被堪輿念王業之艱難每急農桑之務察天
心之仁愛尤深水旱之憂誠意既孚嘉生並應呼嵩高
之萬歲幸覩昌期陳泰階之六符不勝大願

又

詔班新歷雖舉彝章地近清都獨先下拜恩光旁燭小
已知榮謝中臣聞堯授人時實前民用漢得天統克協帝

心方當重熙累洽之盛時宜謹體元居正之大典恭惟
皇帝陛下凝圖丕赫受命溥將齊七政於璿璣昭示太
平之象調四時之玉燭用待來歲之宜爰勅有司以幸
天下臣偶叨牧養獲與布宣職思其憂勸課普殫於綿
力年運而往功名更感於初心

福建到任謝表

咸造在廷甫遂朝宗之願奉使有指遽叨臨遣之榮大
造難名餘生曷報中謝伏念臣么然薄命起自窮閭偶以

元祐之黨家獲與紹興之朝士真人有作景運方開適
當宁數息人才之實難顧一時豪傑號召而未至首蒙
引對面錫殊科遭逢稀濶之知聳動邇遐之聽豈期蹇
薄旋因沈綿卒繫全度之恩俾獲退藏之分侵尋半世
轉徙兩川三為別乘之行再忝專城之寄五十之年已

過非復壯心八千之路來歸恍如昨夢數陳淺拙應對
參差惟譴黜之是宜豈超遷之敢望此蓋伏遇皇帝陛
下道兼倫制澤被堪輿念臣留落有年尚未除於狂態
憐臣馳驅無地空竊抱於愚忠顧雖末路之孤蹤猶玷
外臺之高選臣謹當力思守道深戒瘵官禮樂遠有光
華既大踰於素望靖共好是正直庶少畬於鴻私

江西到任謝表

疏恩趣召靡待一人之言改命遣行猶備四方之使丹

衷欲敝雪涕先傾

謝中

伏念臣稟資迂愚立身羈藐偶竊

犁鉏之餘暇妄窺述作之淵源纍然自力於簡編老之
將至過矣見稱於流輩轉而上聞頃入對於燕朝實親
承於睿獎然而異恩賜第弗由場屋之選掄特旨造廷
非出公卿之論薦已分亟投於閑散豈期重累於生成
此蓋伏遇皇帝陛下立賢無方用人唯已一洗拘攣之
積弊廣收魁傑之遺才施及妄庸亦蒙省錄甫停追詔
還畀使擅凡曰自結於上知皆俾無蹈於後害海嶽之

內纖塵墜露何所用之父母之愛幼子童孫蔑以加此
驅馳入境感懼填膺重念臣樸學守株孤身弔影素乏
蚍蜉螳子之助孰為輪囷蟠木之容愴餘日之安歸抱
微誠而永歎方天子建中和之極用告成功雖文史近
卜祝之間亦思自效尚憑長育不遂棄捐所願預草漢
家檢玉之文未敢遽同堯民擊壤之作剝肝自訴伏鎖
何辭疾痛飢寒仰而呼天誓靡求於世俗齋戒沐浴可
以事帝冀終望於清光

嚴州到任謝表

穿延和之細仗面咫尺天佩新定之左符秩二千石叨
塵過分感懼交懷

謝中

臣聞明主恩深書生命薄唐帝之

知李白一官不及於生前漢皇之念相如遺稿徒求於
身後況如臣輩莫望昔人猥緣一枝之卑嘗綴百僚之
末雖簪笏久違於昕謁乃姓名猶在於淵衷乘傳來歸
兩奉召還之旨懷章欲上亟蒙趣對之榮親降玉音俯
憐雪鬢勞其久別蓋寵嘉近侍之所宜勉以屬文實臨

遣守臣之未有茲蓋伏遇皇帝陛下睿謨冠古英斷如
神肆筆成書千載獨高於聖學刺經作制諸儒絕企於
清光以臣夙被化於明時憐臣未廢書於晚歲將激昂
其素志故濶畧於往愆臣敢不戴使愚使過之恩念有
社有民之寄懇崇陰而聽訟期無墜於家聲及瓜戍而
代歸尚少酬於君賜

除寶謨閣待制謝表

陪衆雋以登瀛已慙薄陋扈六飛而上雍遽踐高華恩

重命輕感深涕霽

謝中

伏念臣材非異稟家本至寒蒼雅

遺書守先臣之孤學莊騷奇作誦諸老之舊聞竊慕隱
居求志之風尤恥譁世取名之事年運而往道阻且長
仕止為貧適遇四朝之盛際老猶不死遂為六聖之遺
民豈期垂盡之時更被非常之遇置之儒館命以信書
特寬尸素之重誅不待汗青而加賞茲蓋伏遇皇帝陛
下道兼倫制學備誠明體穹穹厚厚之仁躋蕩蕩巍巍
之治風行雷動號令靡隔於幽遐魚躍鳶飛人材不遺

於疏賤雖耄期之已迫尚覆育之愈深臣敢不口誦訓辭心銘德澤入預甘泉之筆橐儻效微勞歸尋杜曲之桑麻終祈洪造

轉太中大夫謝表

信史奏篇獲紀兩朝之盛恩書馳驛躡躋四品之榮方醴賞之既行欲牢辭而弗敢始終忝幸俯仰兢慙

中謝伏

念臣身出窮閭家承孤學披肺肝而自力雖有素懷賜骸骨以歸休已更累歲昨被出綸之命起參載筆之遊

強旣昏廢忘之餘均筆削討論之責食常忘事但憂尸
素之當誅成本因人乃以汗青而受寵茲蓋伏遇皇帝
陛下奉先思孝守位曰仁夙受命於皇天克肖其德肆
纂圖於列聖無疆惟休永懷弓劍之藏每切羹牆之慕
爰求遺老俾誦舊聞而臣猥以耄期恭承訓勉愴大父
詩書之業久已寂寥讀元豐文獻之言至於感泣雖追
蓋棺之日敢忘結草之酬

謝致仕表

持橐甘泉已竊逢辰之幸挂冠神武又叨歸老之榮加
恩俯念於耄年延賞特頒於申命伏讀絲綸之語曷勝
犬馬之情

謝中

伏念臣家本窮閭世承孤學雖遇千齡之
盛際初無一日之微勞白首光陰躡冠登瀛之選青雲
步武亟陪上雍之班屬預奏於信書遂祈歸於故里奉
祠雖佚竊食靡安茲洊貢於忱辭始恭承於俞旨至於
特捐異數增賁衰門顧令么微獲被榮耀茲蓋伏遇皇
帝陛下仁參化育道極範圍繼粟繼肉以養賢才祝鯁

祝噓以禮耆耄思貞元之朝士寤寐不忘念山陰之老
人生存無幾越拘攣於令甲聳觀聽於薦紳簡編有光
世類知勸而臣抱病牀第絕望闕廷賤息何能亦忝及
親之祿素風未墜豈無報國之期

落職謝表

叨榮罪大念舊恩深僅鐫筆橐之華猶保桑榆之景仰
慙鴻造下愧公言

中謝

伏念臣本出故家初無他技每自

求於遠宦豈有意於虛名命之多艱動輒為累強起僅

餘於數月退歸又閱於六年齒豁頭童心勤形瘵叫閭
請命蒙恩久許其乞骸飾巾待終視世已同於逆旅敢
謂寬平之邦憲尚令漸盡於里居此蓋伏遇皇帝陛下
勵精大猷惠養遺老念臣生當全盛被六聖之涵濡憐
臣仕遇中興荷三宗之識拔雖名薄責益示殊私臣敢
不祇誦訓詞痛懲宿負尸居餘氣永無再瞻軒陛之期
老生常談莫敘仰戴丘山之意

逆曦授首稱賀表

天無私覆實均父母之仁邦有大刑爰下風雷之令英
斷若神明之速成功無晷刻之淹氛祲澄清頌聲洋溢
賀_中臣伏以高皇有作王室中興方犬戎窺蜀以憑陵賴
驍將奮身而守衛念功無已分閭相承仰累朝寵數之
非常雖舉族糜捐而曷報豈圖小醜自取參夷僭服自
如改元無憚受封割地已北通撫鬻之庭置戍奪符欲
東扼瞿唐之險罪不勝於擢髮誅寧貸於闔門肆推曠
蕩之恩實自聖神之造恭惟皇帝陛下德配天地功光

祖宗覽圖籍而動容每念兩京之未復奉廟祧而實涕
不忘九世之深讐蠹茲雛卵之微自投鼎鑊之地人情
共憤天討遂加菹醢以賜諸侯雖特寬於漢法頭顱之
行萬里已大震於戎心遙知羣醜宵遁之餘無復並塞
秋防之警臣身歸南陌名寓西清馳驛四傳徒快鯨鯢
之戮造朝旅賀莫趨鵷鷺之班

光宗冊寶賀太皇太后牋

諏穀旦於清臺著龜允協奉鴻稱於考廟典冊有嚴慶

襲重闈驪騰函寓恭惟太皇太后殿下道同先后德著
累朝閱天下義理之深體坤元光大之盛密扶睿斷纂
修列聖之治功備述先猷啓迪一人之達孝舉時大典
紹國成規臣斂迹還東馳心拱北紳綏雜遝遙瞻濟濟
之賀班宮闕峇嶢徒寄區區之夢境

皇帝御正殿賀皇后牋

聖治聿新爰正路朝之御邦儀丕舉實繫內助之功盛
典告成函生胥慶恭惟皇后殿下道隆任姒化洽邦家

方當寧之朝羣臣惟聖時克宜中壺之介萬壽與天同
休內騰六寢之驪外副萬方之望臣久違近著獲遇昌
辰聽九賓之臚傳莫陪并舞望五雲之宮闕徒極傾輸

皇帝御正殿賀皇太子賤

清蹕肅九賓之儀方臨當寧寶觴奉萬壽之祝允屬儲
宮邦家有光華裔同慶恭惟皇太子殿下道隆孝友性
極誠明以大學為家傳一洗俗儒章句之陋以密贊為
子職豈獨寢門櫛紕之恭相此多儀實先百辟某久嬰

沈疾已迫頽齡想廣殿之崇嚴莫陪檐翼占前星之明
潤徒極傾馳

皇太子受冊賀皇后牋

壹政憂勤協贊上聖登三之治母慈顧復遂開東宮明
兩之祥汗簡光華函生鼓舞恭惟皇后殿下道光圖史
化被宮闈嗣先后之徽音體柔祇之厚載媯汭之降二
女允謂盛時周臣之止九人實資內助迨此建儲之命
益知儷極之尊臣自去通班久安故里頽齡髦矣莫陪

執玉之趨鉅典煥然不勝拭目之喜

賀皇太子受冊牋

父慈子孝集大慶於我家日吉時良發正衙之顯冊國
勢重於九鼎驩聲達於四方恭惟皇太子殿下秉德淳
明宅心虛靜英姿達識事洞照於幾先強記博聞言必
稽於古訓躬守累朝仁恕之訓日侍兩宮晬穆之顏歷
考古初實為創見臣夙叨四品垂及九齡為國老農莫
造濟濟鵷鷺之列逢時盛典尚懷區區犬馬之心

逆曦授首賀太皇太后牋

叛臣干紀敢萌負固之心密詔行誅不待崇朝之久慶
闕宗社喜溢宮庭臣伏以參井之墟古今重地方高帝
東巡之始實金人南牧之秋爰有駟雄服勞疆圉惟列
聖念功之意每示優隆度故臣誓報之心豈有窮已蠢
茲微孽亦荷異恩入居宿衛之聯出任師干之寄天所
助者順乃懷悖逆之圖人不食其餘自擬殲夷之譴尚
全遺族實出上恩恭惟太皇太后殿下坤厚資生母儀

燕翼每道先朝之家法助成聖主之性仁慰在天之靈
故誅其孥而無赦廣及物之澤故宥其族而弗疑臣久
屏窮閭猶叨近侍用三有宅欣逢湯德之寬於萬斯年
莫預堯封之祝

逆曦授首賀皇后表

逆臣負固上貽正宁之憂密詔行誅不待靈旗之指勲
高古昔喜溢宮庭伏以分閭專征本倚世臣之舊野心
叵測輒干邦憲之嚴妖禽自取於覆巢靡草獨枯於長

夏尚加矜貸曲示涵容故雖同產之親止用徙鄉之典
恭惟皇后殿下道光端淑德配坤元侍膳慈闈克謹晨
昏之奉焦心中壺每分宵旰之勞及此成功允為大慶
聳奮夷之觀聽增竹帛之光華臣久已歸耕莫陪入賀
身修家齊國治實由內助之功天時地利人和行覩外
攘之烈

渭南文集卷一

欽定四庫全書

渭南文集卷二

宋 陸游 撰

丞相率文武百僚請建重明節表

飛龍在天方仰君臨之德流虹繞渚實開聖作之祥宜紀昌辰用彰盛際恭惟皇帝陛下承謨丕顯受命溥將致養三宮備本朝之家法參決萬務得率土之民心正宇初臨積陰頓解於赫明離之象益昭出震之符臣等

不勝大願請以九月四日為重明節伏望皇帝陛下俯
察羣情亟頒俞旨施尊名建顯號侈穹昊發祥之期披
皇圖稽帝文伸臣民歸美之報著之令甲副在有司邦
家增光天下幸甚

又

受命若帝之初宜邦彞之悉舉盛德如天之覆豈人欲
之或違比罄忱辭願標令節未回聰聽曷慰羣情伏以
紀千秋之名雖由唐舊允長春之請則在宋興況今非

獨循累代之成規蓋亦以此侈重華之大慶顯號歟而
未講盛旦鬱而弗彰謙雖益光禮則未稱伏望皇帝陛
下茂昭鉅典亟發德音漢殿尊榮親奉玉卮之壽周行
并蹈各陳金鑑之書豈惟光簡冊之傳實以副天下之
望

又

淵聽未回確爾執謙之意忱辭屢叩歎然歸美之誠曩
典不可以久稽衆心不可以屢拂敢控喁喁之請再干

穆穆之光竊以民之戴君自古有訓禮之飾治後世尤
詳惟大德得其名故因誕彌而紀節雖先王未之有亦
容增益之隨時當渚虹樞電之辰受岳貢川珍之集乃
同常日夫豈人情今者博士議郎固執於庭秩宗奉常
各揚其職必期得請疇敢自安伏望皇帝陛下聖度兼
容大明委照帝辭三祝足昭挹損之懷臣同一心終冀
允俞之命

立皇后丞相率文武百僚稱賀壽皇表

北宮移仗方瞻與子之明中禁正名復奉齊家之訓化
行縣宇驩動羣心

中賀

恭惟至尊壽皇聖帝陛下盛德日

新聖圖天廣雖名持守躬創業垂統之艱不憚憂勤示
詒謀燕翼之法乃者獨觀道妙將就葆頤猶崇朝親發
於德音謂初政莫先於內治茂建壺則所以垂萬世之
典常大明人倫所以移四方之風俗臣等獲塵朝著親
奉睿謨發冊昕廷共仰光華之典稱觴廣殿益深抃舞
之情

賀皇帝表

寶運紹開椒塗首建典冊以時而告具著龜協吉而弗
違慶集宮庭懽傳海宇

中賀

伏以聖人有作追參堯舜禹

之盛時壺範增光上配姜任姒之至德矧惟內助始自
初潛稽女史彤管之言廣周南關雎之化茲正中宮之
位號寶出壽皇之訓謨玉音誕敷汗簡登載求於前世
邈矣未聞顧家國之榮懷宜神祇之安樂恭惟皇帝陛
下仁參蒼昊德被黔黎永惟大學齊家之端先誠其意

推原春秋謹始之義以御于邦故當天臨之初務先坤
載之厚臣等身逢華旦目覩彌文燕至祀祺行慶則百
男之祐雞鳴問寢敢祝於萬年之休

賀皇太后牋

聖子問安方極蘭陔之養神孫正內肇新椒掖之華母
道彌尊人情溢喜

中賀

恭惟皇太后殿下抱神以靜藏心

於淵德修螭蛸蠓渡之中化行崑崙磅礴之外唐虞盛
際迺出一家父子之親任姒徽音仍見三朝婦姑之法

方且享宗社奠安之福視本支蕃衍之祥於古有光與
天無極臣等幸逢熙運獲綴清班至哉坤元實首彝倫
之敘養以天下益觀孝治之隆

賀壽成皇后牋

盛德繼承爰本親傳之妙中宮崇建式光就養之尊慶
集禁庭驩傳海宇

賀中

恭惟壽成皇后殿下婦功飭備母

道含洪躬老氏之儉慈享周家之福祿密贊乾剛之斷
神器有歸助成離照之明天心允奮惟每思於靜順故

備極於安榮袞龍兼綵服之紆綸翟煥玉卮之奉貴無
倫敵日以舒長簡冊燧其有光風俗為之丕變臣等偶
逢熙運獲相多儀坤順承天喜徽音之克嗣孫又有子
知壽祉之無窮

賀皇后牋

誕受丕基方正宁凝旒之始協修陰教舉路朝發冊之
儀厚載有光羣情咸悅

賀中

恭惟皇后殿下慶鍾勲閥道

婉皇家輔佐積勤實自龍潛之日休祥有衍早符熊夢

之占壽皇所以親發於德音聖主所以深資於內助副
筭奉三殿之養大練受六宮之朝震耀簡編感移風俗
臣等預聞鉅典實激歡悰法地所以法天仰戴坤儀之
至德事母同之事父曷勝鼇抃之微誠

文武百寮謝春衣表

寶運紹開方謹人時之授寵光下逮俾均春服之成榮
被簪紳歡騰拜舞謝中恭惟皇帝陛下凝圖丕赫撫運重
熙租稅所儲靡專一己之奉寒暑有賜式厚羣臣之恩

所以恤其澣濯之私蓋將責其忠嘉之報雖舊章之是舉實初政之當先臣等獲綴班聯恭承錫予去女工之蠹已觀府庫之充遺天下之衣願廣乾坤之德

重明節明慶寺丞相率百僚啓建道場疏開起

乾端澄肅時爰及於杪秋離照光明運方隆於中夏敢輸誠悃仰祝壽齡皇帝陛下恭願宜君宜王時萬時億泰元增漢帝之英配天其休洪範錫神禹之疇與民同福

滿散

肅霜協令方觀萬寶之成統電告祥實契千齡之會飭
供既周於月律殫誠爰集於廷紳冀憑薰被之勤仰報
照臨之德皇帝陛下恭願政敷有截壽格無疆天地人
之三才共扶興運堯舜禹之一道永庇函生

進疏

大易明兩作離允符繼照之盛太極函三為一誕擁無
疆之休壽何待於禱祠運自臻於熙洽恭演仙真之秘

旨實輸臣子之至情皇帝陛下恭願化昌羣倫治偕遠
古奉親備天下之養履位處域中之尊至誠之道可以
前知方卜億萬年之永命諸福之物莫不畢至豈止百
千所之上聞

會慶節明慶寺丞相率百僚啓建道場疏開起

有開必先天地肇興於景運無遠弗屆華夷畢効於貢
琛況在周行敢稽壽祝至尊壽皇聖帝陛下伏願道超
古昔化洽黔黎端居無黃屋之心既高揖遜萬彙致綏

衣之養彌極尊榮

滿散

電樞肇紀適逢震夙之期月琯告周游罄延鴻之禱雖
嘉祥之自至顧歸美之敢稽至尊壽皇聖帝陛下伏願
福等河沙壽踰劫石堯仁舜孝治功永煥於青編天大
佛尊眸表長臨於黼辰

進疏

天為羣物之祖可謂極尊壽居五福之先實歸上聖脫

展親傳於大寶頤神方御於殊庭敢率羣倫恭培睿算
至尊壽皇聖帝陛下伏願誕膺戩穀端拱穆清以八千
歲而為春永享舒長之景卜七百年而過歷茂隆貽燕
之祥

文武百僚謝冬衣表

霜露既降著孟冬始裘之文法制具存舉九月授衣之
令進趨檐翼拜舞光華中謝恭惟皇帝陛下大度并包至
仁滲漉及是月也初有祁寒之虞念無衣兮俾膺好賜

之厚疏恩榮於在列斥府庫之餘藏臣等誤荷選掄獲
霑錫予覩萬里農桑之業共樂時平誦羣臣幣帛之詩
誓圖忠報

會慶節丞相率文武百僚賀壽皇表

錫羨無疆丕顯生商之旦成功不處適當命禹之時熙
運親逢羣情胥慶

中賀

恭惟至尊壽皇聖帝陛下仁涵動

植道配堪輿詩書所稱何有加卓爾規模之大唐虞之
際斯為盛超然揖遜之風積勤致王業之成端拱視天

民之阜豈特極高而蟠厚固已勒崇而垂鴻臣等誤置
周行久陶聖化蓬萊隔弱水三萬里獲進謁於殊庭上
古有大椿八千秋冀默符於睿算

丞相率文武百僚賀至尊壽皇聖帝冬至表

化國之日舒以長一陽初復天子之父尊之至萬壽維
祺亞歲肇新羣心胥悅中賀恭惟至尊壽皇聖帝陛下道

兼倫制化極範圍剛長而亨周測土圭之景功成則退
堯無黃屋之心薰然慈孝之兼隆允矣古今之莫及方

且內享視膳問安之大養外騰重熙累洽之頌聲風動
華夷光昭竹帛臣等幸逢盛際獲造昕廷斗建子以定
時是為嘉會星拱辰而在列同罄丹誠

丞相率文武百僚賀皇帝冬至表

一之日以授時黃鐘合律萬斯年而介福赤伏膺符慶
集邦家驪騰海寓中賀恭惟皇帝陛下仁同乾覆道協時
稟旦復旦以重光邦圖有永新又新而不倦帝德難名
默觀造化之機自得財成之妙清心省事成歸根反本

之功任賢去邪體進陽消陰之象臣等幸逢熙運獲遇
威顏和氣先回豈待葭灰之應豐年已兆敢陳雲物之
占

丞相率文武百僚請皇帝聽樂表

祖廟寧神歲序更於燧火禮經有制時當備於簫韶敢
控微衷上干淵聽伏以中月而禪壽皇已循不易之規
逾年改元聖主方受惟新之命儻未舉鈞天之奏何以
慰率土之懷伏望皇帝陛下俯察忱辭仰稽典故欲聞

五聲八音六律以復朝廷之常親帥三公九卿諸侯共
致慈闈之請笙鏞以間而人神喜琴瑟在御而心體安
茂昭庶政之惟和孰謂太平之無象奉萬年之觴於廣
殿及此首春撞千石之鐘於大庭震於四海

丞相率文武百僚賀皇太后受冊牋

獻歲發春太史奏元龜之吉展窠錯事東朝慶大典之
成佳氣一新驩聲四溢

賀中

恭惟壽聖皇太后殿下聰明

睿智壽富康寧踐履艱難佐高廟廓清之烈遵行恭儉

啓壽皇詒燕之圖肆因初元祇奉顯冊璽篆蟲魚之古
樂成鐘磬之和內而百官有司方屏息而觀盛事外則
萬方黎獻咸拜手而頌閔休載稽前聞可謂盡美臣等
偶叨在列獲際升平有子而又有孫共仰本支之盛視
今猶之視昔前知竹帛之傳

丞相率文武百僚賀壽成皇后受冊牋

宮壺塗椒德配重華之盛冊書鏤玉禮行路寢之嚴聖
孝益隆輿情交慶

中賀

恭惟壽成皇后殿下儉慈性稟柔

順躬行至哉坤元象服早光於內治養以天下寢門方
奉於母儀今者稽參六籍之文博盡諸儒之議建此顯
號邁於前聞仰惟貴無敵而富無倫是謂仁之至而義
之盡臣等偶緣在列獲遂逢時紀塢汭塗山之興幸窺
簡牘繼生民思齊之作尚播聲詩

丞相率文武百僚上皇帝賀三殿受冊表

重慶有光仰東朝之慈愛雙親並奉極北內之尊榮正
歲肇新彌文告備邦家之喜夷夏所同

中賀伏以堯舜禹

之相承蓋非一姓姜任姒之善繼又不同時參稽前聞
孰擬昭代恭惟皇帝陛下奄有萬宇統和三靈由至公
大義膺寶運之傳講寢威盛容伸天下之養太史灼龜
而獻兆曲臺繇繇而具儀黃麾之仗風陳簪紳在列白
玉之冊時舉金石克庭既已隆孝道而通神明固將禮
高年而厚風俗新又新而進德老吾老以及人臣等誤
被選掄獲塵班著雖潤色討論於大典每慙稽古之疎
然登降跪拜於路朝實竊逢辰之幸

丞相率文武百僚賀壽皇正旦表

道妙混成太極著兩儀之本天端更始三朝受萬國之
歸慶集有邦歡騰率土中恭惟至尊壽皇聖帝陛下濬
哲稽古清明在躬握乾符闡坤珍難名蕩蕩之德系唐
統接漢緒誕受丕丕之基以海宇之富而蹈巢由高世
之風以父子之親而行堯舜曠代之事迨此獻歲發
春之日實繫攷圖數貢之時史冊增華摺縉太息臣
等幸承睿獎獲覩昌期鵬行畢集於大庭共喜威顏

之近龍袞恪趨於小次更知榮養之尊

丞相率文武百僚賀皇帝正旦表

堯授舜舜授禹方瞻繼照之明正次王王次春茂舉履
端之慶乾坤開闢日月光華中賀恭惟皇帝陛下德上際

而下蟠化東漸而西被改元定號稽列聖之舊章發政
施仁撫重熙之景運內有可封之俗外無不諫之戎方
且采諸儒之議以制朝儀陳九奏之音以為親壽頌朔
靡殊於遐邇受圖高拱於穆清治功卓然海內幸甚臣

等誤膺睿獎獲綴通班戮力同心永惟春秋五始之義
拜手稽首敢奏天子萬年之詩

渭南文集卷二

欽定四庫全書

渭南文集卷三

宋 陸游 撰

蠟彈省劄

癸未二月二府
請至都堂撰

朝廷今來特恃大信明大義於天下依周漢諸侯及唐
藩鎮故事撫定中原不貪土地不利租賦除相度於唐
鄧海泗一帶置關依函谷關外應有據以北州郡歸命
者即其所得州郡裂土封建大者為王帶節度鎮撫大

使賜玉帶金魚塗金銀印其次為郡王帶節度鎮撫使
賜笏頭金帶金魚塗金銅印仍各賜鐵券旌節門戟從
物元係蕃中姓名者仍賜姓名各以長子為節度鎮撫
留後世世襲封永無窮已餘子弟聽奏充部內防團刺
史亦令久任將佐比類金人官制升等換授其國置國
相一員委本國選擇保奏當降真命餘官准此七品以
下聽便宜辟除土地所出並許截留充賞給軍兵祿養
官吏等用更不上供每歲正旦一朝三年大禮一助祭

如有故聽遣留後或國相代行天申會慶節止遣國官
一員將命應刑獄生殺並委本國照紹興勅令參酌施
行更不奏案合行軍法者自從軍法四京各用近畿大
國兼充留守朝廷惟於春季遣使朝陵餘時止用本處
官吏侍祠每遇朝貢當議厚給茶綵香藥等充回賜以
示撫存遇一國有警急諸國迭相救援如開斥生地停
獲金寶並就賜本國仍永不置監司帥臣及監軍等官
候議定各遣子弟一人入覲當特賜燕勞畢即時遣回

機會之來時不可失各宜勇決以稱朝廷開納之意

論選用西北士大夫劄子

臣伏聞天聖以前選用人才多取北人寇準持之尤力故南方士大夫沈抑者多仁宗皇帝照知其弊公聽並觀兼收博采無南北之異於是范仲淹起於吳歐陽修起於楚蔡襄起於閩杜衍起於會稽余靖起於嶺南皆為一時名臣號稱聖宋得人之盛及紹聖崇寧間取南人更多而北方士大夫復有沈抑之歎陳瓘獨見其弊

昌言於朝曰重南輕北分裂有萌嗚呼璿之言天下之至言也臣伏覩方今雖中原未復然往者衣冠南渡蓋亦衆矣其間豈無抱才術蘊器識者而班列之間北人鮮少甚非示天下以廣之道也欲望聖慈命大臣近臣各舉趙魏齊魯秦晉之遺才以漸試用拔其尤者而任之庶上遵仁祖用人之法下慰遺民思舊之心其於國家必將有賴伏惟留神省察取進止

代乞分兵取山東劄子

臣等恭覩陛下特發英斷進討京東以為恢復故疆牽制川陝之謀臣等獲侍清光親奉睿旨不勝欣抃然亦有惓惓之愚不敢隱默者竊見傳聞之言多謂敵兵困於西北不復能保京東加之苛虐相承民不堪命王師若至可不勞而取若審如此說則弔伐之兵本不在衆偏師出境百城自下不世之功何患不成萬一未至盡如所傳敵人尚敢旅拒遺民未能自拔則我師雖衆功亦難必而宿師於外守備先虛我猶知出兵京東以牽

制川陝彼獨不知侵犯兩淮荆襄以牽制京東邪為今
之計莫若戒勅宣撫司以大兵及舟師十分之九固守
江淮控扼要害為不可動之計以十分之一遴選驍勇
有紀律之將使之更出迭入以奇制勝俟徐鄆宋亳等
處撫定之後兩淮受敵處少然後漸次那大兵前進如
此則進有闢國拓土之功退無勞師失備之患實天下
至計也蓋京東去敵都萬里彼雖不能守未害其強兩
淮近在畿甸一城被圍尺地陷沒則朝廷之憂復如去

歲此臣所以夙夜憂懼寢不能瞑而為陛下力陳其愚也且富家巨室未嘗不欲利也然其徒欲賈于遠者率不肯以多貲付之其意以為山行海宿要不可保若傾囊而付一人或一有得失悔其可及哉此言雖小可以喻大願陛下留神察焉臣等誤蒙聖慈待罪樞筦攻守大計實任其責伏惟陛下照其愚忠臣等不勝幸甚取進止

上二府論事劄子

壬午六月五日

某伏見大理寺奏北界蒙城縣官邢珪罪狀竊緣有司之議據其侵犯邊城殺害義旅雖置極典未足當罪然既已具奏則當有特旨恐與有司之議不可同日而語何者有司謹守律令朝廷當斷以大義故也按邢珪生於涿易非祖宗涵養之人仕於偽界非國家祿使之吏身有官守一旦危急力雖不及猶能死守雖慚於逆順不知革面然春秋之義天下之善一也若遂誅之恐非所以勸天下之為人臣者奏陳之際儻為一言貸其草

芥微命以示中國禮義實非小補又慮議者以謂張安國殺耿京事與此略同恐啓寬貸之路無以慰歸附之人則某謂不然張安國中國人又嘗受旗勝招安見利而動賊殺耿京反覆奸猾罪惡明白與珪實為不類兼邢珪所犯在未被大赦蕩滌之前張安國所犯在已受旗勝招安之後伏乞鈞察

上殿劄子三首

壬午十一月

臣恭惟陛下天縱聖智生知文武御極之初內出大號

所以加惠於海內甚渥猶以為未足也乃八月戊子寬恤之令繼下至誠惻怛纖悉備具歡欣之聲達於遠邇可謂盛矣然今既累月不知有司皆已推而致之民乎若猶未也是不免為空文而已無乃不可乎又有大不可者陛下初即大位乃信詔令以示人之時前日數十條或曰當置典憲或曰當議根治或曰當議顯戮可謂丁寧切至赫然非常之英斷也若復為官吏將帥一切翫習漫不加省一旦國家有急陛下詔令戒敕之語將

何加此而欲使人捐肝腦以衛社稷乎周官冢宰以正月之吉始和布治於邦國都鄙垂象之法徇以木鐸曰不用法者國有常刑正月周正今之十一月也正歲夏正今之正月也自十一月至正月若未甚久而申敕告戒俟以刑辟已如此其嚴今命下累月而有司或恬然不以為意臣竊惑之欲望聖慈以所下數十條者申諭中外使恪意奉行毋或失墜仍命諫官御史及外臺之臣精加考覈取其尤沮格者與衆棄之不惟聖澤速得

下究亦使文武小大之臣聳然知詔令之不可慢如此
實聖政之所當先也伏惟留神省察取進止

又

臣聞夏尚忠商尚質周尚文三者迭用非以為異因時
制宜有不得不然者臣竊觀太祖太宗之世法度典章
廣大簡易律令可以禁奸無滋彰之患文移可以應務
無叢委之弊君臣上下如家人父子論說徑直誠意洞
達所詳者大所略者小事易舉功易成其氣象風俗人

物議論至於今可考也太平既久日趨於文放而不還
末流愈遠浮虛失實華藻害道雖號為粲然備具而文
移書判增至數倍居官者窮日之力實不暇給猾吏奸
人乘隙以逞其始也所詳者小所略者大其極也并小
者不復能詳則一切鹵莽聽吏之所為而已太上皇帝
中興大業當宁數息思有以救之於是漸加訂正以還
其舊兩省復通為一以革迂滯之風寺監幾省其半以
去支離之害簡禮容刪律令規模措置蓋欲悉除繁文

復從祖宗之質而後已有司奉承未能盡如本指此陛下今日所當力行不可緩也臣愚欲望聖慈明詔輔臣使帥其屬因今六曹寺監百執事所掌講求祖宗舊制以趨於廣大簡易之域繁碎重複無益實事者一皆省去使小大之臣咸有餘力以察奸去蠹修舉其職則太平之基自此立矣元祐中司馬光請改三省職事一如昔日中書之制蘇轍亦請收昔日三司之權悉歸戶部則臣所謂因今所掌以求祖宗舊制誠不為難願陛下

力行何如爾干冒天聽伏深戰慄取進止

又

臣竊觀周自后稷公劉以來積德深遠卜世長久為之
子孫者宜皆取法焉然而獨曰儀刑文王又曰儀式刑
文王之典漢自高祖創業其後嗣亦多賢君然史臣獨
曰漢言文景美矣至武帝之功烈猶以不遵文景之恭
儉為恨唐三百年一祖三宗皆號盛世而太宗貞觀政
要之書獨傳寶以為大訓元祐中學士范祖禹亦曰祖

宗畏天愛民子孫皆當取法惟仁宗在位最久德澤深厚結於天下誠能專法仁宗則成康之世不難致也嗚呼祖禹之言天下之至言也迨我太上皇帝躬履艱難慨然下詔專法仁祖之政且竊聞燕閒惟考觀仁祖政事是以於萬斯年無疆惟休亦享仁祖垂拱之福可謂盛矣陛下紹休聖緒正當師太上專法仁祖之意申命邁英進讀之臣日以寶訓反覆敷繹以究微意仍命輔臣政事法度一以仁祖為法臣將見陛下福祿川至治

效日見年穀屢豐四夷率服慶歷皇祐之盛復見於今
雖遐方絕壤皆當梯航而至矣況中原故地其有不復
者哉臣不勝至願伏惟聖慈留神省察取進止

擬上殿劄子

壬午准備輪對會
內禪遂不果上

臣觀小毖之詩見成王孜孜求助特在初載意其臨天
下之久閱義理之多則當默識獨斷雖無待於羣臣可
也及考之書然後知其不然舜伐三苗年九十有三聞
伯益一言則退而敷文德舞干羽無一毫自用之意武

王受貢藝年九十有一召公作訓累數百言武王納之
不以為過嗚呼為人臣而不以舜武王望其君者不恭
其君也伏以陛下生知之聖度越百王稽古之學博極
墳典歷試諸艱身濟大業更事閱理多矣自公卿大臣
皆陛下四十年教養所成況於小儒賤士見聞淺陋曾
何足以仰清光備顧問哉然其所陳則未必無尺寸之
長何者舉吏部之籍搢紳之士幾人其得見君父者幾
人白首州縣而不得一望闕門者多矣則凡進見之人

固宜夙夜殫思竭誠以幸千載之遇雖其間有論事梗
野不達大體者究其設心亦願際會犯威顏以徇俗捨
富貴以取名臣竊謂無是理也欲望陛下昭然無置疑
於聖心克己以來之虛心以受之不憚捨短而取長以
求千慮之一得庶幾下情得以畢達羣臣無伯益召公
之賢陛下以舜武王之心為心則是聖德巍巍過於舜
武王矣如其屈萬乘之尊躬日昃之勞顧於疎遠之言
無大施用姑以天地之度容之而已是獨言者一身之

幸也干冒天威臣無任惶怖俟罪之至

上二府乞勿受慶雲圖劄子

癸未春

伏覩尚書省劄子知閬州呂游問奏慶雲見并圖一軸奉聖旨降付編類聖政所仰見主上聖孝推美太上皇帝之心然竊聞太上皇帝建炎之初京東進芝草親詔却之盛德煌煌光映簡冊今乃以慶雲見為聖政恐非太上皇帝之本意兼閬州所奏專以慶雲見於普安郡及在主上即位前一日為受命之符諛佞牽合不識大

體政與京東芝草相類若受而不却雖不報行其誰不知深恐自此草木之妖氛氣之怪緯候之說歌頌之文紛紛來上却之則自啓其端不却則遂將成俗欲望鈞慈以太上皇帝却芝草故事委曲奏陳主上剛明英斷必有以處此矣干冒鈞嚴不勝恐怖之至

上二府論都邑劄子

某自頃奏記迨今累月自顧賤愚不肖無尺寸可以上補聰明而徒以無益之事上勤省閱實有罪焉故久不

敢以姓名徹左右今者偶有拳拳之愚竊謂相公所宜
聞者伏冀少留觀覽幸甚幸甚伏聞北人累書請和仰
惟主上聖武相公威名震疊殊方足以致此而天下又
方厭兵勢且姑從之矣然其聞江左自吳以來未有捨
建康他都者吳嘗都武昌梁嘗都荊渚南唐嘗都洪州
當時為計必以建康距江不遠故求深固之地然皆成
而復毀居而復徙甚者遂至於敗亡相公以為此何哉
天造地設山川形勢有不可易者也車駕駐蹕臨安出

於權宜本非定都以形勢則不固以餽餉則不便海道逼近凜然常有意外之憂至於讖緯俗語則固所不論也今一和之後盟誓已立動有拘礙雖欲營繕勢將艱難某竊謂及今當與之約建康臨安皆係駐蹕之地北使朝聘或就建康或就臨安如此則我得以閒暇之際建都立國而彼既素聞不自疑沮敵人欲借以為辭亦不可者矣今不為後且噬臍至於都邑措置當有節目若相公以為然某且有以繼進其說不一二年不拔

之基立矣某智術淺短不足以議大計然受知之深不敢自以疎遠為疑干冒鈞聽下情恐懼之至

渭南文集卷三

欽定四庫全書

渭南文集卷四

宋 陸游 撰

上殿劄子

臣聞善觀人之國者無他惟公道行與否爾書曰毋虐
瑩獨而畏高明詩曰柔亦不茹剛亦不吐此為國之要
也若夫虐瑩獨畏高明茹柔吐剛而能使天下治者自
古未之有也朝廷之體責大臣宜詳責小臣宜略郡縣

之政治大姓宜詳治小民宜畧賦斂之事宜先富室征稅之事宜覈大商是之謂至平是之謂至公行之一邑則一邑治行之一郡則一郡治行之天下而治不逮於古者萬無是理也伏見朝廷頃因人言必顯有功狀乃畀職名行之數年而大臣近侍不得職者幾人帥臣監司之加職者又比比而有至於銓曹格法所以厄小官者則未嘗少弛張也慶典之行所及至廣貼職以上例皆甄復雖阿附秦氏得罪者亦在焉至於常調孤遠固

多久絀刑憲者今更赦令雖使皆得霑被銓法拘攣必不如是之曠蕩也無乃責大吏反畧而責小臣反詳乎郡縣之吏不能自立觀望揣摩惟強是畏豪右雖犯重辟官吏貪者黠者則公與之為市廉者懦者則又自營曰得無反為所害乎凡嫁娶平人謾罪僮奴者皆有司為之道地也凶年饑歲雖貧富俱病然富者利源至多貧者惟守田畝孰為當恤視郡縣之庭鞭笞流血桎械被體者皆貧民也吳蜀萬里關征相望富商大賈先期

遣人懷金錢以賂津吏大舸重載通行無苦終更小官
造廷進士垂橐蕭然齋糧有限而稽留苛暴略不之恤
如是謂之平可乎謂之公可乎臣昧死伏望陛下推至
平至公之道自朝廷始然後下詔戒敕四方而繼之以
誅賞不過歲月治效自見惟在陛下執之重如山嶽堅
若金石爾荀卿論闢國之說曰兼并易能也堅凝之難
夫豈獨兼并哉凡為政施行之甚易堅凝之甚難臣區
區之言陛下或以為萬有一可采焉敢併以堅凝為獻

取進止

又

臣伏讀御製蘇軾贊有曰手抉雲漢幹造化機氣高天下乃克為之嗚呼陛下之言典謨也軾死且九十年學士大夫徒知尊誦其文而未有知其文之妙在於氣高天下者今陛下獨表而出之豈惟軾死且不朽所以遺學者顧不厚哉然臣竊謂天下萬事皆當以氣為主軾特用之於文爾趙普氣蓋諸國故能成混一之功寇準

氣吞契丹故能成却敵之功范仲淹氣壓靈夏故西討而元昊款伏狄青氣懾嶺海故南征而智高殄滅至於韓琦富弼文彥博之勲勞唐玠包拯孔道輔之風節大抵以氣為主而已蓋氣勝事則事舉氣勝敵則敵服勇者之鬪富者之博非有他也直以氣勝之耳今天下才者衆矣而臣猶有憂者正以任重道遠之氣未能盡及古人也方無事時亦何所賴此一旦或有非常陛下擇羣臣使之假鉞而董二軍擁節而諭萬里雖得賢厚篤

實之士氣不素養臨事惶遽心動色變則其舉措豈不
誤陛下事耶伏望萬幾之餘留神於此作而起之母使
委靡養而成之母使沮折及乎人才爭奮士氣日倍則
緩急惟陛下所使而已且吳蜀閩楚之俗其渾厚勁朴
固已不及中原矣若夫日趨於拘窘怯薄之域臣實懼
國勢之寢弱也不勝私憂犯分獻言恭惟陛下裁赦取
進止

又

臣聞天下有無窮之變而有必然之理惟默觀陰察能得其理則事變之來雖千態萬狀可以坐制而無虞矣天下之變最幽眇倉卒不可測知者莫如雷霆鬼物然雷霆冬伏而春作鬼物晝隱而夜見則其理之必然有不待智者而知之矣今朝廷內無權家世臣外無強藩悍將所慮之變惟一金金人勁敵也不時反覆雖其族類有不能測而臣竊以謂是亦有可必知者夫何故寬猛之相繼如寒暑晝夜之必相代也故自金人強悍以

來靖康建炎之間兵戈擾攘則有紹興之和通和既久則有辛巳之寇寇而敗亡則又有隆興之和今邊陲晏然枹鼓不作逾二十年與紹興通和之歲月略相若矣不知金人終守和約至數十百年而終不變邪將如晝夜寒暑必相代也且金非他敵比也無狐伏之懼有虎視之凶惟制之以力劫之以威則粗能少定今力憊勢削有亂而已其亂不起於骨肉相殘則起於權臣專命又不然則奸雄襲而取之耳三者有一焉反金人之政

以悅其國人且何為哉雖陛下聰明英睿自有所處然臣竊觀士大夫之私論則往往幸敵之懦以為安不知通和已二十餘年如歲且秋矣而謂衣裘為不必備豈不殆哉大抵邊境之備方無事時觀之事事常若有餘一旦有變乃知不足伏望陛下與腹心之臣力圖大計宵旰弗怠繕修兵備搜拔人才明號令信賞罰常如羽書狎至兵鋒已交之日使敵果有變大則掃清燕代復列聖之讐次則平定河洛慰父老之望豈可復如辛巳

倉卒之際斂兵保江凜然更以宗社為憂邪臣世食君
祿且蒙陛下省錄姓名已二十餘年念無以報天地父
母之大恩故其陳於陛下者惟懼不盡而不知狂愚之
為大罪也取進止

乞祠祿劄子

戊申
四月

照對某昨任主管成都府玉局觀將滿陳乞再任蒙恩
差知嚴州於淳熙十三年七月三日到任郡政乖刺雨
澤不時上勞宵旰死有餘責賴蒙朝廷哀矜山郡瘠土

之民重賜蠲放廣行賑恤上格和氣下安衆心入秋得雨陸種倍收六縣並無流徙人戶今春以來雨暘尤為調適二麥繼熟民間亦以為所收倍於常年賑濟訖事稍紓吏責甚雖去替不遠實緣年齡衰邁氣血凋耗夏秋之際痼疾多作欲望鈞慈特賜矜憫許令復就玉局微祿養病故山及天氣尚涼早得就道實為至幸

上殿劄子

臣恭惟陛下躬聖人之資履天子之位而致養三宮承

顏左右盛事赫奕冠映千古尚何待塵露之增山海哉
顧臣竊抱惓惓之愚不敢輒默伏惟陛下聖孝純至稟
於天性昔在潛邸及登儲宮以來夙夜孜孜何嘗頃刻
不以壽皇為心壽皇罷朝而悅進膳而美則陛下欣然
喜動於色壽皇罷朝而不悅進膳而少味則陛下愀然
憂見於色方是時徒能喜之憂之而已今則致親之悅
者責在陛下其可以不深念乎所謂悅親之道非薦旨
甘奉輕暖也非晨昏定省冬夏溫清也非千門萬戶之

金匱要略卷之六
宮鈞天簫韶之樂也惟在陛下得天下之愛戴以寧壽
皇之心而已難鳴而攬衣辨色而視朝必曰此昔者問
安之時也今以萬幾之繁不能日朝重華黻然於懷豈
有限極然闕問安之常禮之小也致天下之治孝之大
也吾其力為其大者乎此固壽皇所望於陛下亦天下
所望於陛下也治功已成中外無事陛下時備法駕率
羣臣上萬年之觴豈非天下之大慶不然太史或以災
異上聞四方或以寇盜來告壽皇聞之萬分有一微輟

王食陛下雖居萬乘之貴孰與解憂哉臣昧死願陛下
於進退人才罷行政事之際率以是為念自三思十思
以至百思不為過也自一日五六日至於旬日不為緩
也謀及卜筮謀及卿士謀及庶人不為廣也一有小失
豈獨上勞宵旰壽皇亦與焉故陛下今日憂勤恭儉百
倍於古帝王乃僅可耳譬如臣民之家上有尊親則所
以交四隣訓子弟備饑饉禦盜賊比之他人自當謹戒
百倍何則彼亦懼憂之及其親也犬馬小臣貪於增廣

聖孝不知言之涉於狂妄冒犯天威伏候斧鉞

又

臣聞詩曰上天之載無聲無臭人君與天同德惟當清
心省事澹然虛靜損之又損至於無為大臣不得而窺
所好則希合苟容之害息小臣不得而窺所好則諂諛
側媚之風止不以從其所好而加賞則儉人伏不以逆
其所好而加罪則端士進玩好無益之物不好則不接
於目諛諧敗度之言不好則不聞於耳大抵危亂之根

本讒巧之機芽奸邪之罅隙皆緣所好而生臣下雖有
所偏好而或未至大害者無奉之者也有人君則不然絲
毫之念形於中心雖未嘗以告人而九州四海已悉向
之矣況發於命令見於事為乎且嗜好之為害不獨聲
色狗馬宮室寶玉之類也好儒生而不得真則張禹之
徒足以為亂階好文士而不責實則韋渠牟之徒足以
敗君德其他可推而知矣昔者漢文帝及我仁宗皇帝
所以為萬世帝王之師者惟無所嗜好而已恭惟陛下

龍飛御極之初天下傾耳拭目之時所當戒者惟嗜好而已無有作好遵王之道天之所以錫神禹也伏惟陛下留神省察實天下幸甚取進止

上殿劄子

己酉四月十三日

臣聞王者以一人之身臨制四海人情錯出事變還至惟靜以俟之則心虛而明惟重以持之則體大而正無偏聽之過無輕舉之失天何言哉舜何為哉後世士大夫學術卑陋識慮褊淺顧謂王者得位必有以聳動天

下於是厭常喜新之論興飾智駭俗之政作衆人之所
喜而君子之所深憂也臣伏見陛下自在潛邸以至龍
飛御宇三十年間天下之事何所不習雖日出百令固
亦易爾乃謙恭退託而安靜無為沈潛淵默而聰明不
作上則承壽皇之睿謨下則盡羣臣之公議及乎議有
未決徐而斷之政有當行從而舉之理愜事允出臣下
思慮之表有心者誠服有口者頌數則所謂靜與重者
陛下既得之矣嗚呼一郡一邑之長視事之始尚且以

新奇眩衆以敏速釣名陛下有天下之利勢而不用有
聖智之絕識而不施超越羣倫奚啻萬億而或者方以
聳動天下為獻此固兒童之見而陛下所不取也竊恐
羣臣獻此說者寔多雖陛下決不取然臣不勝惓惓愛
君之愚忠思有以堅聖心而廣初政昔魏鄭公憂貞觀
之政漸不克終蘇轍亦謂但如元祐之初足矣若夫進
銳退速能動耳目之觀聽而無至誠惻怛之心以終之
如明皇之焚錦繡德宗之放馴象實陛下之龜鑑也故

臣願陛下圖事揆策不厭於從容行賞議罰無取於快意兢兢業業常如此三月之間則成康文景之盛復見於今日矣犬馬小臣出位妄言冒犯天威臣無任

又

臣聞天下有定理決不可易者飢必食渴必飲疾必藥暑必簦豈容以他物易之也哉臣伏觀今日之患莫大於民貧救民之貧莫先於輕賦若賦不加輕別求他術則用力雖多終必無益立法雖備終必不行以臣愚計

之朝廷若未有深入遠討犁庭掃穴之意能於用度之間事事裁損陛下又躬節儉以勵風俗則賦於民者必有可輕之理緩急之備固不可無姑以歲月徐為之可也如是則和氣浹洽必無水旱之災驩聲洋溢必無盜賊之警何慮國用之不足邪設使裔夷弗賓侵犯王略所謂率其子弟攻其父母直可舞干羽而格之爾頃者建炎紹興戡定變亂之日一切賦斂有非承平之舊者高宗皇帝宵旰焦勞每欲俟小定而悉除之故詔令布

告天下曰惟八世祖宗之澤豈汝能忘顧一時社稷之
憂非予獲已止俟捍防之隙首圖蠲省之宜臣幼年親
見民誦斯詔至於感泣雖傾貲以助軍興而不敢愛旋
屬國家多故金敵畔盟雖所蠲已多終未仰稱聖意壽
皇聖帝臨御以來所以節用裕民者皆繼承高祖蠲省
之指也則陛下今日豈可不以為先務哉臣昧死欲望
聖慈恢大度明遠畧詔輔臣計司博盡論議量入而用
量用而取可蠲者蠲可省者省富藏於民何異府庫果

有非常孰不樂輸以報君父淪肌浹髓之恩哉若有事之時既竭其財矣幸而無事又曰儲積以為他日之備也雖恢復中原又將曰邊境日廣矣屯戍日衆矣則斯民困弊何時而已邪瀆犯天威罪當萬死惟陛下裁赦取進止

除修史上殿劄子

臣伏見真宗皇帝至道三年冬修太宗實錄至明年咸平元年八月而畢甫九閱月修書者錢若水柴成務宗

度吳淵楊億五人而已書成又詔重修太祖實錄至明年六月而畢亦甫九閱月修書者王元之梁灝趙安仁李宗諤四人而已臣竊考之太祖討澤潞取楊州平吳滅蜀定荆楚下五嶺太宗撫有吳越蕩定汾晉用師薊門問罪夏臺皆大舉動業廣事叢議論煩委兵機戎政攻守餽餉功罪黜陟之事可謂夥矣至於制禮作樂明刑治歷修廢官舉隆典革五季之弊復漢唐之盛側席求治可謂勤矣宜其摹寫日月形容造化雖累歲不成

而奏書之速不淹三時上足以慰羹牆之思下足以厭薦紳之望非獨此數人者畢精竭思之力也意者當時命令重刑賞必尊君體國之俗成凡史官紬繹之所須者上則中書密院下則百司庶府以至四方萬里郡國之遠重編累牘如水赴海源源而集然後以耳目所接察隧碑行述之諛辭以衆論所存刊野史小說之謬妄取天下之公去一家之私而史成矣九閱月而奏書臣誠未見其為速也臣乞身累年忽蒙聖恩起之山澤之

間使與聞大典既不累以他職又特寬其朝謁責委之意可謂重矣然臣之愚慮有欲陳者未敢遽以仰瀆天聽而略具梗槩於前欲乞聖慈明詔大臣俟臣供職有所陳請擇其可者出自朝廷主張施行如臣不能自力曠職守負聖知則竄殛之刑所不敢避取進止

乞致仕劄子

癸亥

臣輒冒重誅仰干洪造伏念臣生逢千載仕歷四朝晚蒙旒宸之知爰錫弓旌之召濫司汗簡擢長僊蓬曾未

幾時亟躋近列雖願輸於塵露顧已迫於桑榆記問荒疎文辭衰退重負夜行之責難貪晝接之榮又況與奏成書獲經審覽時則可矣敢少緩於控陳天實臨之冀俯從於懇款伏望聖慈許臣守本官職依前致仕

又

臣近緣實錄院進書已畢具奏乞守本官職依前致仕準尚書省劄子奉聖旨不允者伏念臣學緣病廢志與年衰步蹇弗支髮存無幾出入鴈行之內惕然有覲於


面顏追參豹尾之間觀者亦為之指目豈容冒昧久竊寵榮敢干咫尺之威洊貢再三之請萬冀黃卷悵已負於初心十具烏捷冀獲安於故里伏望聖慈特賜開允

又

子甲

臣輒傾愚懇仰達聖聰伏念臣衰頽餘齡已開九秩遭逢盛際逮事四朝擢置周行初出高皇之獨斷進登法從晚蒙陛下之異知期歲強顏秋毫無補及瀝乞身之請更蒙優老之除久此叨塵豈勝危懼雖天地之恩未

報而犬馬之力已窮杜曲桑麻儻遂扶犁之初願灞橋
風雪更尋策蹇之舊遊誓教訓於子孫用報酬於君父
伏望聖慈許臣守本官職致仕



渭南文集卷四